

# تعنت الانقلاب مستمر في العقرب .. زوجة "أحمد دله" تروي "الزيارة المستحيلة"



الاثنين 27 يونيو 2016 01:06 م

أم خالد أحمد زوجة المهندس أحمد عبدالوهاب دله المعتقل بسجن العقرب تحكي عن معاناة الزيارة المستحيلة، في منشور لها بموقع فيس بوك :

كنا حاجزين للزيارة من إسبوعين وإسمنا موجود فى الكشف  
وصلنا النهاردة قدام بوابة سجون طره الساعة ٦ صباحا وبدأ على الساعة ٦ ونصف يدخل الزيارات من البوابة الخارجية علشان يحنط الأهالى  
فى الفرن المسمى بالكافيتريا  
نادى الضابط المسؤل بعد ( أقفوا طابور ) بتاعة كل مرة على الأسامى الموجودة فى الكشف إلى هما ٣٠ اسم من أصل مايقرب من  
١٠٠٠معتقل  
المهم دخل حوالى ٢٥ زيارة وإتفاجأت إنه شاطب على إسمنا إحنا و٣ زيارات كمان  
ولما سألنا عن السبب قال إنتوا غير مستحقين مع إنه فات يوم أو يومين على ميعاد زيارتنا  
وقفنا وأصرينا إننا مستحقين  
قالولنا إنتظروا لما ييجى المدير  
جه المدير وكل شوية نسالهم يقولوا بنكشف على الأسامى مستحقة ولا لأ  
كل دا وإحنا واقفين فى الشمس وصايمين لحوالى ٩ إلا ربع  
لما إتأكدوا إننا مستحقين ودخلونا  
طبعا دخلنا لقينا إخواننا إلى دخلوا قبلنا مازالوا محشورين فى الكافيتريا  
جه الطفطف ودخلنا وقعدنا قدام سجن العقرب (حيث الهواء الجميل والمكان المكيف والمقاعد المريحة (طبعا تريقة ) )  
ودخلنا الزيارة على ١١ ونصف تقريبا  
زيارة ٧ دقائق فى كابينة أشبه ماتكون بحمام السونة  
إحنا بنموت من الحر وزوجى أماننا يتصب عرقا وطبعا الأطفال بس إلى سلموا  
خرجنا وفضلنا منتظرين الطفطف قدام العقرب ( علشان ممنوع السير داخل سجون طره على الأقدام )علشان نخرج للساعة ٢ وكلنا مرهقين  
من العطش وقلة النوم وعابزين نروح نريح  
ولما تعبنا قررنا إننا مش هنتظر الطفطف ونمشى  
إتمشينا لحد ما قربنا من سجن الملحق والعساكر حاولوا يمنعونا ولما فشلوا جه المدير وجابلنا الطفطف بعدها بحوالى ١٠ دقائق  
بعد ما كنا خلاص تعبنا ومكانش فيه ريق أساسا والأطفال إلى صايمة هلكت من التعب  
وإحنا خارجين بنحجز للزيارة إلى بعدها لقيته بيقوللى زيارتك يوم ١٦ -٧- يعنى هيكون عدى ٢٣ يوم  
إلى هى المفروض كل ١٥ يوم  
دى كانت زيارة العقرب